



CONCLUSIÓNS

XII. CONCLUSIÓNS

O obxectivo deste informe é analizar, dende a perspectiva da infancia e adolescencia, a política de orzamentos da Xunta de Galicia para o ano 2023. A necesidade de contar con ferramentas que avalíen axéitamente o esforzo destinado aos nenos precisa dispoñer de información sobre os esforzos autonómicos que se están a facer.

Polo tanto, é preciso ter en conta os orzamentos dedicados a infancia e adolescencia para medir o grado de adecuación dos mesmos as necesidades. O anterior, garante un exercicio de transparencia sobre os procedementos de asignación do orzamentos para comprobar a incidencia real sobre a infancia e adolescencia.

Por primeira vez, realizouse un exercicio de estimación pomenorizado de políticas relacionadas coa infancia por parte da Xunta de Galicia. Con este traballo cómprese unhas das recomendacións feitas pola ONU para coñecer a incidencia das actuacións orzamentarias, dende a perspectiva do gasto. Do estudo realizado, derívanse as seguintes conclusións:

A porcentaxe que supón o gasto en infancia e adolescencia nos Orzamentos da Comunidade Autónoma de Galicia en 2023 é do 29,4%(4). En termos absolutos isto supón 3.705,5 millóns de euros. A Consellería de Cultura, Educación, Formación Profesional e Universidades protagoniza o 61,2% do total deste gasto, seguida da Consellería de Sanidade, co 19,2% do total. Este resultado entra dentro do previsible, posto que a clasificación orgánica do orzamento responde as anteriores políticas de gasto.

É a Consellería de Cultura, Educación, Formación Profesional e Universidades a que destina unha maior parte do seu orzamento a infancia e adolescencia (77,3%), seguida da Consellería de Política Social e Xuventude (27,8%). Pola contra, a Consellería do Mar é a que presenta unha menor porcentaxe sobre o seu gasto total (4,1%).

Atendendo á clasificación do gasto segundo os dereitos da infancia (desenvolvemento pleno, supervivencia, protección, información e outros bens públicos) o gasto en desenvolvemento pleno é o máis elevado (81,2%), seguido do gasto en supervivencia (41,4%). En terceiro lugar estaría o gasto en protección (19,6%). Compre sinalar que un mesmo proxecto pode destinar os seus recursos a máis dun dereito, polo que a suma da porcentaxe de gasto segundo os dereitos da infancia supera o 100%.

Utilizando como variable de clasificación as categorías de gasto: presenza de nenos, presenza de adultos, presenza de adultos e nenos, bens públicos e colectivos particulares, a maior parte do gasto corresponde a proxectos onde se require a presenza legal ou natural de nenos e nenas (36,1%), seguido dos gastos asociados a bens públicos (36,7%) e daqueles gastos cuxo beneficio se dirixe a un determinado colectivo ou subconxunto da poboación total á que se refire o orzamento (26,0%).

4 Porcentaxe referido ao orzamento consolidado, que comprende o das entidades con orzamento limitativo (Administración xeral, organismos autónomos e axencias públicas autonómicas e entidades públicas instrumentais de asesoramento ou consulta) e no que non se contemplan os capítulos de gasto VIII e do IX o apartado 95 de amortización da débeda pública.

Ao 60,5% do orzamento estáselle a imputar un gasto en infancia e adolescencia segundo a porcentaxe que esta poboación supón sobre o total (14,1%), un 9,1% non ten gasto asociado a infancia e adolescencia e un 12,6% do gasto do orzamento está destinado exclusivamente a este colectivo.

O importe dos proxectos sen gasto en infancia ascende a 1.149,3 millóns de euros, un 12,6% do orzamento. Este valor distribúese por consellerías do seguinte xeito: un 48,7% corresponde á Consellería de Cultura, Educación, Formación Profesional e Universidades, un 24,5% á Consellería de Emprego e Igualdade, un 12,9% á Consellería do Mar e un 5,3% á Vicepresidencia 2ª e Consellería de Economía, Industria e Innovación.

Dentro dos proxectos que imputan o 100% do seu gasto á infancia e adolescencia, o dereito con maior porcentaxe deste tipo (referido ao importe dos mesmos sobre o total do dereito) é o de Protección (69,0%), seguido do de Desenvolvemento Pleno (67,6%). Pola contra, son os dereitos de Supervivencia e Outros Bens Públicos os que presentan a maior porcentaxe de proxectos co 14,1% de gasto en infancia, o 58,9% no primeiro caso e o 48,0% no segundo (dato esperable ao tratarse dunha partida máis xeralista).

Ao considerar o gasto dedicado á infancia e a adolescencia e tendo en conta as categorías dos proxectos, o 43,0% do gasto corresponde a proxectos onde a porcentaxe dedicada á infancia e adolescencia é do 100%, O 29,0% do gasto rexístrase en proxectos con 14,1% destinado a este fin, os proxectos onde a porcentaxe se sitúa entre o 14,1% e o 100% representan o 27,5% do gasto e por último o 2,2% corresponde a aqueles proxectos con porcentaxes menores do 14,1%.

En termos do *Plan Estratégico de Galicia 2022-2030*, se temos en conta a porcentaxe de gasto en infancia e adolescencia de cada un dos eixes observamos que é no *Eixe IV de Cohesión social e territorial* onde a porcentaxe é máis elevada, un 60,7% - posto que é neste eixe onde se encadra a educación- seguido do *Eixe I de Reto demográfico*, -que recolle o gasto en saúde e temas relacionados coa conciliación (recollendo expresamente as escolas infantís)-. No resto dos eixes a porcentaxe oscila entre o 12,4% do eixe 2 e o 13,9 do Eixe 3.